

28 JUN 2000

Sothinathan-sumpah/I

SOTHINATHAN ANGKAT SUMPAH JAWATAN SETIAUSAHA PARLIMEN

PUTRAJAYA, 28 Jun (Bernama) -- Anggota Parlimen Teluk Kemang yang baru dipilih, S. Sothinathan hari ini mengangkat sumpah sebagai Setiausaha Parlimen Kementerian Kesihatan.

Beliau mengangkat sumpah menyimpan rahsia di hadapan Datuk Seri Dr Mahathir Mohamad di Jabatan Perdana Menteri di sini.

Pelantikan Sothinathan, 40, berkuatkuasa 23 Jun. Beliau mengambil alih jawatan itu daripada S.A. Anpalagan yang meninggal dunia pada 28 April.

Sothinathan, bekas setiausaha politik Menteri Kerja Raya Datuk Seri S.Samy Vellu, memenangi kerusi Teluk Kemang dalam pilihan raya kecil pada 10 Jun lepas dengan menewaskan Ruslan Kasim dari Parti Keadilan Nasional.

Anak kelahiran Port Dickson ini adalah lulusan ekonomi dari Universiti Malaya sebelum memperolehi ijazah undang-undang dari University of London.

Sothinathan berkata pelantikannya ke jawatan kerajaan itu akan membolehkannya berkhidmat lebih berkesan untuk pengundi di kawasan Teluk Kemang.

"Ia tugas tambahan kepada saya tetapi itu tidak menjadi masalah. Malahan, ia memberi peluang kepada saya untuk menemui lebih ramai orang untuk membolehkan saya berkhidmat dengan lebih baik," katanya.

-- BERNAMA

AR ES MAI